

Negeri Sembilan lancar aplikasi VSP salur maklumat, aduan kepada polis

Oleh KU MOHD. RIZDUAN KU ABDUL RAHMAN



Mohamad (tengah) melancarkan aplikasi VSP sambil diperhatikan Ketua Polis Negara, Tan Sri Khalid Abu Bakar (kiri sebelah) pada Hari Terbuka PDRM Negeri Sembilan di Dataran Centrio Seremban 2 malam ini. Turut kelihatan Ketua Polis negeri, Datuk Jaafar Mohd Yusof (kanan).

SEREMBAN - Menteri Besar Negeri Sembilan, Datuk Seri Mohamad Hasan merasmikan pelancaran Volunteer Smartphone Patrol (VSP) peringkat kontinjen negeri, malam ini.

Majlis yang turut dihadiri Ketua Polis Negara, Tan Sri Khalid Abu Bakar dan Ketua Polis negeri, Datuk Jaafar Mohd. Yusof berlangsung di Dataran Centrio, Seremban 2 di sini.

Mohamad berkata, aplikasi mudah alih melalui peranti telefon pintar itu memberi banyak manfaat kerana ia memudahkan masyarakat menyalurkan maklumat kepada polis bagi memerangi jenayah.

Mengulas lanjut, beliau memberitahu, orang ramai boleh menyalurkan aduan atau maklumat yang dilengkapi dengan video, gambar dan koordinat GPS lokasi kejadian menerusi aplikasi VSP kepada polis.

"Pada masa ini, semua orang memiliki telefon pintar dan saya harap mereka dapat menggunakan aplikasi VSP supaya kadar jenayah dapat diturunkan" katanya.

Beliau berkata demikian ketika berucap pada Hari Terbuka pasukan Polis Diraja Malaysia (PDRM) Negeri Sembilan sempena Sambutan Hari Polis ke-210.

Aplikasi VSP dibangunkan menerusi kerjasama dengan Unit Pemodenan Tadbiran dan Perancangan Pengurusan Malaysia (MAMPU) dengan PDRM dibawah Program Rakan Cop. - K! ONLINE